

Na osnovu člana 59. stav (1) tačka d) Zakona o visokom obrazovanju (Sl. novine TK broj 8/08, 11/09 i 12/09), a u vezi sa članom 126. istog Zakona, člana 75. stav (1) tačka 2) Statuta Univerziteta u Tuzli (Prečišćeni tekst), broj: 03-8605-2/11 od 19.10.2011. godine, Senat Univerziteta u Tuzli na sjednici održanoj 02.11.2011. godine donio je

ODLUKU
O IZMJENAMA I DOPUNAMA PRAVILA STUDIRANJA NA PRVOM CIKLUSU
STUDIJA NA UNIVERZITETU U TUZLI

Član 1.

U Pravilima studiranja na prvom ciklusu studija na Univerzitetu u Tuzli broj: 03-8965-2/10 od 18.11.2010. godine, iza člana 3. dodaje se novi podnaslov koji glasi: "III Organizacija studija", a briše se podnaslov: "Uslovi upisa"

Član 2.

Član 4. mijenja se i glasi:

"Pravo upisa na studijske programe prvog ciklusa studija, imaju lica koja su završila srednju školu u četvorogodišnjem trajanju i položila prijemni ispit za odgovarajući studijski program. Bliže odredbe o uslovima upisa, procedurama i postupku odabira studenata utvrđene su Procedurama za prijem studenata koje donosi Senat Univerziteta, u skladu sa Zakonom i Statutom Univerziteta".

Član 3.

U članu 6. stav 3. iza riječi "planom" dodaju se riječi: "u skladu sa Odlukom Senata".

Član 4.

Član 14. mijenja se i glasi:

"Zimski semestar student ovjerava nakon završetka nastave zimskog, a ljetni semestar po završetku nastave ljetnog semestra svake studijske godine. Tokom ovjere semestra evidentira se broj ECTS kredita koje je student ostvario. Student koji u ostavljenom roku ne ovjeri zimski, odnosno ljetni semestar obnavlja upis u istu godinu studija".

Član 5.

Član 15. mijenja se i glasi:

"Student koji u toku akademske godine na upisanom studijskom programu položi ispite i stekne 60 ECTS bodova ima pravo upisa u narednu godinu studija na osnovu ostvarenih ECTS bodova iz prethodne godine studija. Student može prenijeti u narednu godinu studija odgovarajući broj ECTS bodova utvrđen Statutom, u skladu sa Zakonom. Ukoliko student ne ostvari utvrđeni broj ECTS bodova obnavlja upis u istu godinu studija".

Član 6.

U članu 18. u stavu 2. alineja 1. iza riječi "odsustvu" dodaju se riječi: "odnosno student, otac djeteta, student usvojlac, u slučaju smrti majke ili za slučaj da majka napusti dijete, ili je iz opravdanih razloga spriječena da koristi to pravo".

Iza stava 5. dodaje se novi stav koji glasi:

"Mirovanje statusa studenta evidentira se u indeksu i matičnoj evidenciji studentske službe".
Dosadašnji stav 5. postaje stav 7. i u istom se iza riječi "prema" dodaju riječi: "važećem nastavnom planu i programu".

Iza stava 7. dodaje se novi stav 8. koji glasi:

"Ukoliko student u toku akademske godine u kojoj mu miruje status ostvari prava ili izvršava obaveze, iste će se poništiti".

Član 7.

Iza člana 18. dodaje se novo poglavlje koje glasi: "Prelazak sa drugog univerziteta" i u okviru istog novi članovi 18a i 18b koji glase:

Član18a

"Student drugog javnog univerziteta može preći i nastaviti studij na prvoj ili drugoj godini studija istog/srodnog studijskog programa fakulteta/ADU Univerziteta, u skladu sa Listom srodnih studijskih programa koja čini sastavni dio ovog Pravilnika.

Prelazak u smislu prethodnog stava može se odobriti pod slijedećim uslovima:

- da je studijski program sa kojeg student prelazi akreditovan,
- da je student upisao ljetni semestar tekuće akademske godine na drugom univerzitetu,
- da ima status redovnog studenta u tekućoj akademskoj godini studija i ostvarenih najmanje 25 ECTS bodova u toj studijskoj godini.

Prelazak sa drugog univerziteta može se odobriti za najviše 10 (deset) studenata po studijskom programu, u statusu redovnog studenta koji se sam finansira.

U slučaju da zahtjev za prelazak podnese više od 10 (deset) studenata, odobravanje prelaska vršit će se prema kriteriju ostvarene veće prosječne ocjene u toku studija i ostvarenog većeg broja ECTS bodova".

Član18b

"Student Univerziteta može preći sa upisanog studijskog programa na srodan studijski program fakulteta/ADU Univerziteta, u skladu sa Listom srodnih studijskih programa i pod slijedećim uslovima:

- da je proveo najmanje jednu akademsku godinu na drugom studijskom programu,
- da ima status redovnog studenta u tekućoj akademskoj godini i ostvarenih najmanje 25 ECTS bodova, te ostvarenu prosječnu ocjenu od najmanje 8 (osam).

Promjena studijskog programa u smislu prethodnog stava može se odobriti za najviše 5 (pet) studenata, po studijskom programu, u statusu redovnog studenta koji se sam finansira.

U slučaju da zahtjev za promjenu studijskog programa podnese više od 5 (pet) studenata, odobravanje se vrši prema kriteriju ostvarene veće prosječne ocjene u toku studija i ostvarenog većeg broja ECTS bodova".

Član 8.

U podnaslovu "Promjena studijskog programa" dodaju se riječi "na Univerzitetu".

Član 9.

Član 19. mijenja se i glasi:

"Konačno odlučivanje po zahtjevu za prelazak sa drugog univerziteta, odnosno promjenu studijskog programa na Univerzitetu mora se završiti prije početka nove akademske godine.

Uz zahtjev za prelazak/promjenu studijskog programa student prilaže uvjerenje o statusu studenta, uvjerenje o postignutom uspjehu na prethodnom studijskom programu, te ovjeren studijski program kod prelaska sa drugog univerziteta.

Student podnosi zahtjev dekanu fakulteta/Akademije najkasnije do 15.07. tekuće akademske godine, a ispisnicu sa drugog univerziteta, odnosno studijskog programa, najkasnije do 01.09. tekuće godine ukoliko se prelazak odobri.

O zahtjevu studenta odlučuje dekan rješenjem.

Prelazak sa drugog univerziteta, odnosno promjenu studijskog programa na Univerzitetu student može koristiti samo jedanput u toku ciklusa studija".

Član 10.

Iza člana 19. dodaje se podnaslov: "Način prepoznavanja položenih ispita".

Član 11.

Iza člana 20. dodaju se nova dva poglavlja i po jedan pripadajući novi član koji glase:

VIII ZAVRŠETAK STUDIJA PRIJE UTVRĐENOG ROKA

Član 20a

„Studentu koji je položio sve ispite iz prethodne godine studija i ostvario ukupnu prosječnu ocjenu od najmanje 9,5 može se, na njegov zahtjev odobriti polaganje 2 (dva) ispita iz naredne studijske godine, zajedno sa ispitima iz tekuće godine".

IX NASTAVAK STUDIJA NAKON ZAVRŠENE VIŠE ŠKOLE

Član 20b

"Licu sa završenom višom školom može se odobriti nastavak studija na odgovarajućoj studijskoj godini na istom studijskom programu fakulteta Univerziteta prema važećem nastavnom planu i programu fakulteta na kojem se odobri sticanje statusa studenta, u skladu sa načinom organizacije samog studija, uz prethodno izvršenu ekvivalenciju završenog studija.

U slučaju da zahtjev za nastavak studija podnese više od 20 lica, odobravanje nastavka studija vrši se uz prethodno odobrenje Senata Univerziteta.

Zahtjev za nastavak studija podnosi se do 15.07. tekuće akademske godine, uz podnošenje dokaza utvrđenih članom 9. ovog Pravilnika.

Lice kome se odobri nastavak studija stiče status studenta koji se samostalno finansira".

Član 12.

U članu 21. stav 1. iza riječi "drugoj" dodaje se riječ: "istorodnoj".

Član 13.

Ova Odluka stupa na snagu danom donošenja, a primjenjivat će se od akademske 2011/12. godine.

UNIVERZITET U TUZLI

Broj: 03-8971-3/11

Tuzla, 02.11.2011. godine

PREDSJEDNIK SENATA

Prof.dr.sc. Enver Halilović